



REPUBLIKA E SHQIPËRISË
Këshilli i Ministrave

V E N D I M

Nr.414, datë 27.06.2012

PËR

DISA NDRYSHIME NË VENDIMIN NR.1114, DATË 30.7.2008, TË KËSHILLIT TË MINISTRAVE, “ PËR DISA ÇËSHTJE NË ZBATIM TË LIGJEVE NR.7703, DATË 11.05.1993 “PËR SIGURIMET SHOQËRORE NË REPUBLIKËN E SHQIPËRISË”, TË NDRYSHUAR, NR. 9136, DATË 11.9.2003, “PËR MBLEDHJEN E KONTRIBUTEVE TË DETYRUESHME TË SIGURIMEVE SHOQËRORE DHE SHËNDETËSORE NË REPUBLIKËN E SHQIPËRISË”, TË NDRYSHUAR, DHE NR.7870, DATË 13.10.1994 “PËR SIGURIMET SHËNDETËSORE NË REPUBLIKËN E SHQIPËRISË”, TË NDRYSHUAR”.

Në mbështetje të nenit 100 të Kushtetutës, të ligjit nr. 7703, datë 11.5.1993, "Për sigurimet shoqërore në Republikën e Shqipërisë", të ndryshuar, të Ligjit nr. 7870, datë 13.10.1994, "Për sigurimet shëndetësore në Republikën e Shqipërisë", të ndryshuar, dhe të nenit 4 të ligjit nr. 10 487, datë 5.12.2011, "Për buxhetin e vitit 2012", me propozimin e ministrit të Financave, Këshilli i Ministrave

V E N D O S I :

Në vendimin nr. 1114, datë 30.7.2008, të Këshillit të Ministrave, të ndryshuar, bëhen këto ndryshime:

1. Paragrafi i parë, i pikës 2, të kreut II, ndryshohet si më poshtë vijon:
“Paga minimale mujore, për efekt të llogaritjes së kontributeve të sigurimeve, shoqërore e shëndetësore, nga data 1.7.2012 e në vazhdim, të jetë jo më pak se 18 295 (tetëmbëdhjetë mijë e dyqind e nëntëdhjetë e pesë) lekë, ndërsa paga maksimale mujore të jetë 91 475 (nëntëdhjetë e një mijë e katërqind e shtatëdhjetë e pesë) lekë.
2. Pikat 1, 2, 6, 7, 9, 10, 11 e 13, të kreut III, ndryshohen, si më poshtë vijon:

1. Shuma minimale mujore e kontributeve, për të gjitha degët e sigurimit, për periudhën nga data 1.7.2012 e në vazhdim, të jetë 5 104 (pesë mijë e njëqind e katër) lekë.

Kontributi minimal mujor sipas degëve të sigurimit, të jetë:

	në %	në lekë
Dega e sigurimit të sëmundjeve	0.3	55;
Dega e sigurimit të barrë lindjeve	1.4	256;
Dega e sigurimit të pensioneve	21.6	3 952;
Dega e sigurimit të aksidenteve dhe sëmundjeve profesionale	0.3	55;
Dega e sigurimit të papunësisë	0.9	165;
Sigurimet shëndetësore	3.4	622.

2. Shuma minimale mujore e kontributit të sigurimit shëndetësor për të vetëpunësuarin dhe për pjesëtarët e papaguar të familjes që jetojnë e punojnë me të vetëpunësuarin, të jetë 7 për qind e pagës minimale mujore, e barabartë me 1 280 (një mijë e dyqind e tetëdhjetë) lekë.

6.I vetëpunësuarin, i vetëpunësuarin në ortakëri, i vetëpunësuarin që punëson të tretë (me përjashtim të të vetëpunësuarit në bujqësi), duke filluar nga data 1.7.2012 e në vazhdim, paguan për vete një kontribut të detyrueshëm, për sigurimet, shoqërore dhe shëndetësore, në masën 30 për qind (23 për qind sigurim shoqëror dhe 7 për qind sigurim shëndetësor) të pagës mujore minimale prej 18 295 (tetëmbëdhjetë mijë e dyqind e nëntëdhjetë e dy) lekësh, të barabartë me 5 488 (pesë mijë e katërqind e tetëdhjet e tetë) lekë në muaj.

7.I vetëpunësuarin, për pjesëtarët e familjes së tij, mbi 16 vjeç, që nuk trajtohen me pagë, por që punojnë e bashkëjetojnë me të ligjërisht (me përjashtim të të vetëpunësuarit në bujqësi), duke filluar nga data 1.7.2012 e në vazhdim, paguan kontribut të detyrueshëm për sigurimet, shoqërore dhe shëndetësore, në masën 30 për qind (23 për qind sigurim shoqëror, dhe 7 për qind sigurim shëndetësor) të pagës mujore minimale prej 18 295 (tetëmbëdhjetë mijë e dyqind e nëntëdhjetë e dy) lekësh, të barabartë me 5 488 (pesë mijë e katërqind e tetëdhjet e tetë) lekë në muaj.

9. Personat e vetëpunësuar në veprimtari, tregtare apo shërbimi, ambulante, nga data 1.7.2012 e në vazhdim, të deklarojnë dhe paguajnë kontribut minimal mujor, në shumën 2 250 (dymijë e dyqind e pesëdhjetë) lekë.

10. Personat mbi 16 vjeç, me të ardhura të rregullta nga pronësia e që nuk janë të punësuar diku tjetër, duke filluar nga 1.7.2012 e në vazhdim, të paguajnë kontribut vetëm për sigurimin shëndetësor, në masën 7 për qind të pagës mujore minimale, prej 18 295 (tetëmbëdhjetë mijë e dyqind e nëntëdhjetë e pesë) lekësh.

11. Të vetëpunësuarit në bujqësi, nga data 1.7.2012 e në vazhdim, të derdhin kontribut vjetor për sigurimet shoqërore, në masën 27 000 (njëzet e shtatë mijë) lekë, me përjashtim të të vetëpunësuarve, që banojnë në rrethet Bulqizë, Dibër, Gramsh, Has, Kolonjë, Kukës, Librazhd, Malësi e Madhe, Mat, Mirditë, Pukë, Skrapar, Tepelenë dhe Tropojë, për të

cilët masa e kontributit vjetor është 20 400 (njëzet mijë e katërqind) lekë.

13. Kontributi i detyrueshëm për sigurimet shoqërore, për personat, që punojnë si punëtorë shtëpie, nga data 1.7.2012 e në vazhdim, të jetë 2 250 (dymijë e dyqind e pesëdhjetë) lekë në muaj.

3. Pika 6, të kreut V, riformulohet si vijon:

Instituti i Sigurimeve Shoqërore furnizon punëdhënësit dhe të vetëpunësuarit me librezat e sigurimeve shoqërore e shëndetësore. Punëdhënësi pais të punësuarit e tij me librezën e kontributeve të sigurimeve shoqërore e shëndetësore dhe i plotëson ato çdo muaj, në datën e pagesës së pagës mujore. Për të vetëpunësuarit, dhe pjestarët e familjes të patrajtuar me pagë si dhe për punëmarrësit e punësuar tek i vetëpunësuarit që ka statusin “i vetëpunësuar me punëmarrës”, librezat e kontributeve plotësohet dhe vërtetohet nga strukturat lokale të autorizuara të Institutit të Sigurimeve Shoqërore.

Të vetëpunësuarit në bujqësi, të cilët nuk arrijnë të plotësojnë kushtin minimal të vjetërsisë në punë, për të përfituar pension të pjesshëm sipas dispozitave të ligjit nr. 7703, datë 11.5.1993 “Për sigurimet shoqërore në Republikën e Shqipërisë”, të ndryshuar, mund të kryejnë pagesa kontributesh edhe pas plotësimit të moshës për pension por me kusht që ato t’u korrespondojnë periudhave para plotësimit të moshës për pension.

Të vetëpunësuarit në bujqësi paguajnë kontributet për sigurimet shoqërore dhe shëndetësore, për vitin 2012 e në vazhdim, pavarësisht se mund të jenë të pasiguruar për vitet pararendëse. Periudhat për të cilat nuk janë paguar kontributet nuk njihen periudha sigurimi.

Të vetëpunësuarit në bujqësi, të cilët nuk i kanë paguar kontributet e sigurimeve shoqërore për periudha të kaluara, por që i kanë patur kushtet për t’u siguruar si të vetëpunësuar në bujqësi, pavarësisht vendbanimit aktual, mund të paguajnë kontributet me kuotat e vitit përkatës së bashku me kamatëvonesat e llogaritura.

4. Pika 9 e kreut V, riformulohet si vijon:

Në tremujorin pasardhës të vetëpunësuarit, pjestarët e papaguar të familjes, punëmarrësit e punësuar tek i vetëpunësuarit që ka statusin “i vetëpunësuar me punëmarrës”, të vetëpunësuarit në veprimtari ambulante dhe të vetëpunësuarit në bujqësi, vlerësohen të siguruar, nëse i kanë paguar kontributet e tremujorit pararendës brenda afateve të përcaktuara me ligjin nr. 7703, datë 1.5.1993 “Për sigurimet shoqërore në Republikën e Shqipërisë”, të ndryshuar.

5. Kreu VIII ndryshohet, si më poshtë vijon:

“VIII. SHUMA BAZË E PËRFITIMEVE

1. Në mbështetje të neneve 2, 32, 36, e 48, të ligjit nr. 7703, datë 11.5.1993 “Për sigurimet shoqërore në Republikën e Shqipërisë”, të ndryshuar, shuma bazë e përfitimit nga data 1.7.2012 e në vazhdim, të jetë 11 562 (njëmbëdhjetë mijë e pesëqind e gjashtëdhjetë e dy) lekë në muaj.

2. Në mbështetje të nenit 96, të ligjit nr. 7703, datë 11. 5. 1993, “Për sigurimet shoqërore në Republikën e Shqipërisë”, të ndryshuar, shuma e përfitimit, për personat, që nuk plotësojnë kushtet për përfitimin e masës së pensionit, të përcaktuar në paragrafin e parë, të këtij neni, nga data 1.7.2012 e në vazhdim, të jetë 7 841 (shtatë mijë e tetëqind e dyzet e një) lekë në muaj.

3. Në mbështetje të pikës 3, të nenit 27, të pikës 2, të nenit 59, dhe të nenit 60, të ligjit nr. 7703, datë 11.5.1993, “Për sigurimet shoqërore në Republikën e Shqipërisë”, të ndryshuar, baza e vlerësuar mujore për efekt të llogaritjes së të ardhurave për barrë lindje, për rastet kur e drejta e përfitimit ka lindur, por përfituesja nuk ka pagë gjatë gjithë muajve të vitit të fundit kalendarik, llogaritet duke bashkuar shumën e pagave faktike për muajt që është derdhur kontribut për sigurimet shoqërore, me shumën e pagave minimale të përcaktuara për efekt të derdhjes së kontributit të sigurimit shoqëror për muajt pa kontribut, pjestuar me 12 muaj.

4. Në mbështetje të pikës 4, të nenit 27, të ligjit nr. 7703, datë 11.5.1993, “Për sigurimet shoqërore në Republikën e Shqipërisë”, të ndryshuar, shuma bazë e përfitimit për gratë, të cilat e kanë periudhën e fundit të sigurimit si të vetëpunësuar në bujqësi, nga data 1.7.2012 e në vazhdim, të jetë 7 841 (shtatë mijë e tetëqind e dyzet e një) lekë në muaj.”

5. Në zbatim të pikës 4 të nenit 32 të ligjit 7703, datë 11.05.1993 “ Për Sigurimet Shoqërore në Republikën e Shqipërisë” si pagë neto për periudhat e punës përpara datës 1.10.1994 vlerësohet të jetë shuma që del pasi nga paga referuese e përcaktuar me vendimin e Këshillit të Ministrave nr. 561, datë 12.08.2005 “Për caktimin e pagës referuese për llogaritjen e pensioneve” zbritet tatimi mbi të ardhurat personale i përcaktuar me ligjin nr. 7585, datë 14.7.1992 “Për tatimin mbi të ardhurat personale”, i ndryshuar.

Ky vendim hyn në fuqi pas botimit në “Fletoren zyrtare” dhe i shtrin efektet nga data 01.07.2012.

K R Y E M I N I S T R I

SALI BERISHA

This document was created with Win2PDF available at <http://www.win2pdf.com>.
The unregistered version of Win2PDF is for evaluation or non-commercial use only.
This page will not be added after purchasing Win2PDF.